

Tiada niat jahat isytihar proklamasi darurat: PM

Hak asasi manusia, harta persendirian serta hak undang-undang lain tetap dijaga

Oleh Mohd Zaky Zainuddin
zaky@bh.com.my

Kuala Lumpur: Tan Sri Muhyiddin Yassin menegaskan proklamasi darurat tidak akan digunakan untuk melanggar hak asasi manusia, harta persendirian dan hak undang-undang lain di Malaysia.

Perdana Menteri berkata, Malaysia memiliki kepercayaan kukuh kepada peraturan undang-undang dan tidak akan menghinakan prinsip perundangan yang sudah dipegang.

"Ini juga penting untuk komuniti perniagaan sama ada domestik atau antarabangsa untuk memahaminya," katanya berucap pada Majlis Perjumpaan Bersama Pihak Industri di sini, semalam.

Yang turut hadir, Menteri Perdagangan Antarabangsa dan In-



Muhyiddin pada Majlis Perjumpaan Bersama Pihak Industri di Kuala Lumpur, semalam. Turut hadir, Mohamed Azmin dan Ban Hong. (Foto BERNAMA)

dustri (MITI), Datuk Seri Mohamed Azmin Ali dan timbalannya, Datuk Lim Ban Hong.

Muhyiddin berkata, satu-satunya alasan di sebalik pengisytiharan proklamasi darurat adalah bagi mengesan langkah lebih cepat berkaitan pengurusan COVID-19.

Katanya, ia turut merangkumi beberapa perkara berkaitan dengan penggunaan aset hospital swasta, pemilikan sementara tanah, bangunan atau harta benda swasta untuk merawat pe-

sakit COVID-19.

"Oleh itu, yakinlah tiada sebarang niat jahat di sebalik pengisytiharan proklamasi darurat ini," katanya.

Pada 12 Januari lalu, Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah memperkenankan tempoh pelaksanaan darurat hingga 1 Ogos 2021 atau sehingga suatu tarikh yang lebih awal jika angka kes positif COVID-19 harian dapat dikawal dan diturunkan dengan berkesan.

Baginda turut berkenan terhadap cadangan kerajaan bagi pembentukan satu Jawatankuasa Bebas yang akan dianggotai Ahli Parlimen kerajaan dan pembangkang serta pakar kesihatan dan yang berkaitan.

Al-Sultan Abdullah memberi perkenan supaya Pengisytiharan Proklamasi Darurat dilaksanakan sebagai langkah proaktif untuk membendung gejala wabak COVID-19 selepas menerima menghadap Perdana Menteri di Istana Negara.